

Կարծիք

Քարտեղյան Սամվել Մարտիրոսի «Սոցիալ-իրավական պետության սահմանադրական մոդելի կայացման հիմնախնդիրները Հայաստանի Հանրապետությունում» թեմայով ԺԲ.00.02 «Հանրային իրավունք» մասնագիտությամբ թեկնածուական ատենախոսության վերաբերյալ

Գրախոսվող թեկնածուական աշխատանքն իր առջև դրված խնդիրներով և ուսումնասիրման առարկայով խիստ արդիական է ազգային ազգային պետականաշինության ադի փուլում, երբ հրապարակի վրա է սահմանադրական բարեփոխումներ հիմնական փաթեթը:

Այս առումով կարելի է արձանագրել, որ նախատեսվելիք սահմանադրական բարեփոխումներն անհրաժեշտ են Հայաստանի Հանրապետությունում սոցիալ-իրավական պետության կայացման և մարդու իրավունքների երաշխավորված պաշտպանության համար:

Հետազոտության հիմնական նպատակն է բացահայտել սոցիալ-իրավական պետության, որպես նոր և նորագույն ժամանակաշրջանի երրորդ (առաջին սերունդը՝ իրավական պետությունն է, երկրորդը՝ սոցիալական և երրորդը՝ սոցիալ-իրավական) սերնդի պետականության էությունը և բովանդակային առանձնահատկությունները:

Դրված նպատակին հետամուտ, հեղինակը փորձի է լուծել հետևյալ խնդիրները.

- բացահայտել սոցիալ-իրավական պետության էությունը, առանձնահատկությունները և ժամանակակից ընկալումները.
- վերլուծել սոցիալ-իրավական պետության կայացման հետ կապված հիմնախնդիրների բովանդակությունը և դրանց լուծման ուղիները,
- ներկայացնել մարդու իրավունքների երաշխավորված պաշտպանության կառուցակարգերը սահմանադրական բարեփոխումների համատեքստում,
- արժևորել սոցիալ-իրավական պետության և մարդու իրավունքների երաշխավորված պաշտպանության դերն ու նշանակությունը հասարակության կայուն զարգացման և երկրի անվտանգության ապահովման համատեքստում:

Աշխատանքի ուսումնասիրությունից կարելի է եզրակացնել, որ հեղինակը պատշաճ գիտական խորությամբ է լուծել իր առջև դրված խնդիրները, իսկ հետազոտության արդյունքների հիման վրա ձևակերպել է մի շարք առաջարկություններ և հեղինակային մոտեցումներ, որոնք ունեն տեսական և գործնական նշանակություն:

Քննարկվող ատենախոսական աշխատանքի **գիտական նորույթն** արտահայտվում է հետսահմանադրական բարեփոխումների պայմաններում իրավական, սոցիալական (սոցիալ-իրավական) պետության կայացման, մարդու իրավունքների երաշխավորված պաշտպանության կառուցակարգերի հետ կապված համալիր հարցադրումների վերլուծության և դրանց համարժեք լուծումների առաջադրման մեջ:

Հեղինակը սոցիալ-իրավական պետությունը դիտարկում է որպես զարգացման երրորդ սերնդի պետականություն, որը մարմնավորում է իրավական և սոցիալական տեսանկյունները և հանդես է գալիս որպես հասարակական հարաբերությունների սահմանադրականացման ու սոցիալական արդարության հիման վրա կազմակերպված քաղաքական իշխանության նոր տիպ:

Այս առումով, կարելի է արձանագրել, որ հեղինակը բացահայտել է սոցիալ-իրավական պետության էությունը, բովանդակային առանձնահատկությունները և հիմնական առաքելությունը՝ ապահովել մարդու անվտանգ, բարեկեցիկ և կայուն զարգացումը:

Հետազոտության տեսական նշանակությունը նրանում է, որ գրախոսվող աշխատանքի արդյունքները սոցիալ-իրավական պետության և մարդու իրավունքների վերաբերյալ որոշակիորեն կխորացնեն մեր գիտելիքները այդ բնագավառում և կարող են օգտագործվել հետագա հետազոտողների կողմից՝ իրենց գիտական ուսումնասիրությունների ընթացքում:

Հետազոտության գործնական նշանակությունը նրանում է, որ քննարկվող աշխատանքում ձևակերպված դրույթները և եզրահանգումները կարող են օգտագործվել հայոց պետականաշինության իրավաստեղծ և իրավակիրառ գործընթացներում, ինչպես նաև ուսումնական գործընթացների ժամանակ:

Կատարված դրական աշխատանքի վերաբերյալ ունենք որոշակի նկատառումներ, որոնք հանգում են հետևյալին.

Առաջին, աշխատանքը բովանդակային առումով ավելի շահեկան կներկայանար, եթե հեղինակը հանգամանորեն լուսաբաներ իրավական պետության և սոցիալական պետության հայեցակարգային պատմական զարգացման հիմնական ուղենիշները:

Երկրորդ, աշխատանքում հոդվինակը հանգամանորեն վերլուծության է ենթարկում իրավական պետության իրավաբանական չափանիշները (օրինակ՝ օրենքի գերակայությունը և այլն), սակայն նույնը չի կարելի ասել սոցիալական պետության վերաբերյալ, չէ որ բացի տնտեսական գործոններից, սոցիալական պետությունն էլ ունի որոշակի իրավաբանական չափորոշիչներ կամ մոտեցումներ:

Այդուհանդերձ, գտնում ենք, որ նշված նկատառումները կրում են մասնակի բնույթ և բնավ չեն կարող ազդել ատենախոսական աշխատանքի դրական արժեքների վրա:

Ատենախոսության թեման և բովանդակությունը լիովին համապատասխանում են ընտրած մասնագիտությանը:

Աշխատանքում ձևակերպված առաջարկությունները և եզրահանգումները ունեն զգալի տեսական ու գործնական նշանակություն:

Ելնելով վերոշարադրյալից, գտնում ենք, որ Սամվել Մարտիրոսի Բարսեղյանի «Սոցիալ-իրավական պետության սահմանադրական մոդելի կայացման հիմնախնդիրները Հայաստանի Հանրապետությունում» ԺԲ.00.02 «Հանրային իրավունք» մասնագիտությամբ թեկնածուական ատենախոսությունը գիտական նորույթ պարունակող, ամբողջական ու ավարտուն հետազոտություն է, այն լիովին բավարարում է «ՀՀ-ում գիտական աստիճանաշնորհման կանոնակարգի» 6-րդ, 7-րդ կետերի պահանջները, ուստի հեղինակն արժանի է իր կողմից հայցվող գիտական աստիճանի կոչմանը:

**Պաշտոնական ընդդիմախոս՝
իրավաբանական գիտությունների թեկնածու
Սարգսյան**

Հովհ.



**Հովհաննես Սարգսյանի ստորագրությունը հաստատում են «Մաշտոց»
համալսարանի ռեկտոր՝ Զավեն Սարգսյան**